



屋脣該頭木瓜樹

屋脣一頭木瓜樹，結有四、五十條大大細細个木瓜，實在打眼！路過个人，目珠毋係生到頭那頂，總會看佢一眼，毋著！標準个動作係黏邊停下來，目珠對木瓜樹盡頂高開始，慢慢仔射出欽羨个目光，停留在大粒細粒个木瓜面頂，續等用阿腦个聲哨講「麼人種个木瓜，仰會打到恁結？」輒常就在脣頭，聽著這話，佢會開容笑面，目珠看到其他个地方去。

隔壁个伯姆逐日行路對吾屋脣過，有時節看著佢，當面會講青木瓜生有恁大隻，喊佢好摘下來，燉排骨分佢讀國中个妹仔食。聽講，當當發育个細妹仔有需要食！有成時，舖娘就撈半斤排骨、半條木瓜切做一坵一坵，再放兜仔鹽同甘杞，燉做一鑊木瓜排骨湯。吾妹仔逐擺就連食幾下餐，毋單淨無食忒還食到會驚！包尾，還係愛請阿爸阿姆來搵手食！聽講，大人食也乜當好，毋過同發育無相關！

講著食，木瓜也有異多个料理！青木瓜除忒拿來煮湯，像木瓜排骨湯、木瓜雪耳湯以外，還做得拿來刷做絲或者切做片，淋上醬料攪攪啊，麼个泰式料理、臺式料理就有這品菜！尤其係熱天，冰到冰箱等佢冷正拿出來食，味緒當好，食也定著會尋尾！當然，黃熟个木瓜，毋使攞麼个醬料，打淨食就食得出特殊个甜，還有特殊个香味喔！這滿，口涎水無流出來就毋著囉！吾屋脣該頭木瓜樹，打个木瓜，等到熟黃个時節，撈佢摘下切來食，有一種市面項木瓜無个香味，無講耗漿，毋信，你摘來食看啊就知哩！

屋脣个木瓜樹，既經種有三年零，隔壁个阿伯講這應該係「時木瓜」。時木瓜，做得生幾下年，緊生緊高，緊生緊打！就像學校先生宿舍个後背該頭，就佢看過以來，到今超過五、六年，樹頂高不時吊等木瓜，愛摘佢無恁該，轉黃轉熟後，總係等等知食个膨尾鼠或者歸群个長尾鵲來搶食，樹頂黃黃个木瓜，這一空該一空，無一隻完整，到尾跌落樹頭下分蟻公、螞公食，乜分脣頭个植物做養分。

屋脣該頭木瓜樹，到這下還做得生到好好，實在無簡單！記得正種个頭年年下仔，樹頂高个木瓜乜打到當結。毋過蟻公滿哪仔爬、金蜂仔滿哪仔叨、木瓜同木瓜葉背生當多白白个菌，毋敢洩藥仔、水沖沖毋絕，木瓜打到不格不格，葉仔燥黃到會死會死，強強會消忒！無想著第二年春天，樹身開始杈桎綻新筍，佢就同本旦个杈桎鏹忒，該新筍就生做新樹桎，綻出新葉、開花結子囉！

結結个木瓜樹，脣項有當多人个目珠，眼盯仔緊看。

作者：邱一帆

☆詞彙學習☆

- | | |
|----------------------------|-------------------------------------|
| 【聲哨】sang' sau：說話時發出的聲調或音色。 | 【不格不格】bud' gied' bud' gied'：畸形、長不大。 |
| 【甘杞】gam' gi：枸杞。 | 【杈桎】ca a'：枝桎。 |
| 【包尾】bau' mi：最後。 | 【鏹忒】dun' ted'：用器具如柴刀、鋸子除去樹幹。 |
| 【頭年】teu' ngien：第一年。 | |
| 【金蜂仔】gim' pung' e：果蠅。 | |